


弘毅公衍慶錄



衍慶錄卷之八

曾孫愛必達敬纂

弘毅公自叙

康熙四十四年遵旨於吏部庫內所貯叙功襲職陞官無圈點清字案件內查

得巴圖魯姑夫弘毅公額宜都自述檔案本無漢字今照依原文譯出

巴圖魯姑夫攻圖倫城時

上躬往。予先入類其城。取之。以予先入取城。將班達錫之母與之。巴圖魯姑夫別督兵攻舒爾格布占城。取之。以所得城中之物盡予之。予視同往効力之人。分行給與。獲傷一。巴圖魯姑夫別督兵取巴爾達城。當攻城時。予跨城堞以戰。敵人所射之矢。貫吾身。釘於城垣。

不能下。以刀斷矢入其城。取之。以所得城中之勅書  
產業戶口。盡與之。有自城中竄往哈達之戶口。復來  
投歸者。

上以爲予之缺分。盡補與之。以得是城之故。

上躬出迎。椎二牛以筵宴。以巴爾達栗色名馬。併鞍轡與之。  
獲肉傷五十。浮傷甚衆。薩克查以兵來犯時。巴圖魯  
姑夫率屬侶擊敗之。以敗是兵之故。

上躬出迎。椎牛筵宴。以蟒衣帽帶靴弓矢撒袋。及他庫乃橐  
騮名馬與之。是役也。獲肉傷一。攻尼麻喇城時。

上躬往。巴圖魯姑夫首先率衆取之。所與人口馬牛甚多。攻  
是城。所獲浮傷甚衆。攻章甲城時。

上躬往。命巴圖魯姑夫奪其城門。以揚書姑夫騰果二人副  
之。彼二人未及奪。予獨入奪得其門。以取是城之故。  
將卓賽之母。併人七口。勅書三通。與之。攻是城。獲傷  
二。以予表兄噶哈善哈思護被害。攻索爾和村時。

上躬往。攻是城。巴圖魯姑夫戰起衆。悉以城中男婦。俾予斬  
之。獲傷二。將噶哈善哈思護之家產奴僕。勅書。盡予  
之。是戰也。

上深加褒獎。併將表兄一應之物。盡予之。巴圖魯姑夫率侶  
屬十七人。往色克齊城。殺渣愷科薩。乘夜掘城以入。  
覓渣愷科薩。已逃未得。獲馬羊三十餘。以獻。

上深加褒獎。阿都叔之馬九匹。在大村。被界凡能人名科什

者。盜以竄。巴圖魯姑夫。單騎追至庫勒之野。斬科什。取九馬獻。

上。

上以與予。予以與阿都叔。追斬是賊。獲傷一。

上深加褒獎。嘉木湖之貝渾巴顏。與沙吉王季奴麻法。二族人。合謀欲危。

上。叛附哈達。自哈達處。將一馬一勅書來。有名科什巴者。潛來以告。

上謂巴圖魯姑夫曰。汝兄之貝渾巴顏。汝往殺之。遂將一父四子。皆殺之。以其家產奴僕勅書盡與之。因無一人得脫。

上深加褒獎。九國大兵。併力來侵。時以予超衆出戰。九國兵敗。殺葉赫布賽貝勒。將布賽貝勒所乘連鞍轡紅馬。及所佩撒袋與之。又一駝所載明安貝勒之蒙古帳房。併明安貝勒所著貂鼠披領。再皮襖。圍子。各十件。馬十四匹。與之。又以。

上所乘那爾渾紅馬與之。擊敗是兵。

上深加褒賞。出畧訥賽山寨。卓佳村時。和落村馬法之侶伴。名齊法漢者。歿於敵。失其尸。巴圖魯姑夫。還擊。陷陣。敗敵。取其尸以歸。將和落村馬法治罪。取一人一牛與予。因獲其尸。

上深嘉之。訥殷之七村人。叛附輝發。巴圖魯姑夫。同噶蓋札。

爾固齊。往圍其佛多和城。歷三月。至第四月。克其城。遂盡殺之。以唐秦莫爾根杜陵俄二族人與之。

上以圍經四月。力守拔之。深加褒獎。巴圖魯姑夫。同董鄂洛額駙。達爾漢下。往征札庫塔城。盡取其部落。巴圖魯姑夫。往征雅攬部落。盡克取之。巴圖魯姑夫。往征赫席黑部落。盡克取之。予年十九。當我

國肇迹之初。歸附於

上。所効力之處在是。至我

國大業既集。凡征討哈達。輝發。烏喇。葉赫。漢人所効力處。俱未載入。天聰六年正月二十日。巴圖魯姑夫弘毅。公額宜都諸子。以父功泯沒。將父自記之處。懇

恩具奏。奉

旨著授伊少子遏必隆為三等總兵官。

衍慶錄卷之九

曾孫愛必達敬纂

弘毅公行畧

公諱額宜都。長白山人。姓鈕祜祿氏。

賜姓覺羅氏。生於明嘉靖四十一年壬戌。公甫在孩提。父母皆爲讐所害。公賴鄰村人抱匿得脫。隻身無伯叔兄弟。唯一姑。適蘓克蘓河之嘉木湖村長穆通阿巴圖魯。公年十三。乘間殺其讐。往依姑家。穆通阿巴圖魯見而異之。曰。此子弱齡。能舉復讐大事。且其狀貌雄邁。器識沉毅。一代人傑也。因愛養如己子。穆通阿巴圖魯得一白鷹。聞之者以爲稀見。咸來就觀。時

太祖皇帝亦與焉。穆通阿巴圖魯知。

太祖意喜此鷹。遂獻之。公與姑子噶哈善哈思護獵回。途遇太祖。謁白鷹。行詢之。知爲父所與。心頗不平。次日。鷹忽飛至家。穆通阿巴圖魯謂公與噶哈善哈思護曰。此鷹業已與人。不可匿留。爾等速往送還。二人益不平。不得已。謁鷹往見。

太祖

太祖謂二人曰。鷹雖禽屬。能不舍故主而飛還者。是其義也。爾等可將回。以成此鷹之義。二人聞之。乃驚相謂曰。吾父誠識人。其體恤禽屬如是。至於待人。不必言矣。由是二人心知。

太祖爲非常人。深加尊敬。及穆通阿巴圖魯歿後。公與噶哈善哈思護親愛若同胞。時公年十九。

太祖經過嘉木湖村。留宿其家。公知。

太祖之志。欲從行。請於姑。姑念兄只此一子。又年少。堅意不許。公奮然曰。大丈夫豈可虛度此生耶。任至何處。斷不負姑教養之恩。姑不得已。許之。次日。遂從。

太祖行。先是蘓克蘓河圖倫城之尼堪外蘭。陰誘明總兵官李成良。攻古勒城。長阿台章京。沙吉城。長阿海章京。遂屠其城。

皇祖考適在城中。因皆罹患。阿台之妻

太祖伯父禮敦巴圖魯女也。  
皇祖考以救女在古勒城。

太祖聞之勃然大怒。泣謂明邊臣曰。爾國人無故戕我祖父。吾與爾國。乃不共戴天之仇矣。明君臣具馬匹幣帛等物。備禮儀歸。

二帝靈輓。勅

太祖爲都督以謝。

太祖必欲生致尼堪外蘭。乃已。於是明邊臣佯言。置尼堪外蘭於佳版城。爲滿洲國主。滿洲國人信之。皆往歸焉。而寧古塔之族衆。亦皆相誓於堂子。謀害。

太祖歸於尼堪外蘭。尼堪外蘭借勢迫。

太祖降。

太祖愈怒。是時

太祖力甚單弱。衆纔十三人。公乃往嘉木湖村。約噶哈善哈思護。協謀爲復讐之舉。噶哈善哈思護。又說占畢勒河長楊書常書兄弟。同詣

太祖請曰。念我等扞誠。先衆來歸。幸相恤如手足。勿以屬下衆人見待。

太祖大喜。即共禱於天。椎牛挿血爲盟。遂往伐尼堪外蘭。攻圖倫城。公先登。頽其城。克之。尼堪外蘭窘迫。亡匿於佳版城。

太祖深加褒獎。益識公之勇畧忠誠。超絕衆人。自此遂視如一體。

恩遇無與倫比。是戰也。雖未擒獲尼堪外蘭。然



太祖復讐積憤。由此稍舒矣。此公佐

命策勲邀

知遇。効悃誠之始基也。攻色克齊城。公率數人。乘敵不備。取之。

太祖躬往迎勞。椎牛設宴。解衣帽橐鞬。併所乘名馬賜之。攻舒爾格布占城。先登拔之。

太祖悉以城中之物賜之。公分給從攻効力士卒。一無所私。自

太祖躬行天討。滿洲部落。皆相繼歸誠。唯巴爾達城之衆。恃強窺伺。未有降意。

太祖特命公督兵往攻。方秋。渾河水漲。公以繩聯軍士。魚貫而渡。率壯卒數人。乘夜急馳抵城下。公先登。城中兵悉力迎拒。公跨堞以戰。身被血創五十餘。浮創無算。飛矢貫身。著於城堞。公揮刀斷矢。戰益力。不少衰。卒拔其城。

太祖聞之大喜。躬往迎勞。椎牛設宴。賜衣馬橐鞬等物。又以巴爾達城之衆。悉賜予之。薩克查以兵來犯。公率數人敗之。乘夜追至其城。拔之。攻尼麻喇城。先衆疾戰。取之。攻章甲城。

太祖命公往奪其門。以楊書姑夫騰果二人副之。二人未及前。公疾戰獨入。奪其門。遂克其城。被創二。以卓賽之母枯鋪。又人七口。勅書三。賜之。先是公之表兄噶哈

行慶錄 卷九  
善哈思護自歸附

太祖以來。矢忠誠。贊謀畫。往往深遠過人。

太祖嘉其謀畧。以胞妹妻之。命稱姑夫。甚親密。甲申春。噶哈善哈思護姑夫。取家屬至嘉木湖村。而

太祖繼母弟薩穆展等忌

太祖自復仇討逆以來。豪傑日集。恐遂成大業。因與

太祖伯父之子隆敦合謀。欲先剪其羽翼。適值噶哈善哈思護姑夫。隻身回家。乃設計率族人。伏於馬爾敦山殺之。

太祖聞之。不勝悲憤。移置其屍於內室。衣以已衣。厚加殯葬。四月。

太祖以兵授公曰。汝可報汝兄之讐。於是領兵攻索爾和村。公超衆深入。力戰敗敵。取其城。盡屠其男婦。以歸。被劄二。以噶哈善哈思護之家產。奴屬。勅書等物。盡賜之。嘉木湖村之貝渾巴顏。與沙吉王季奴麻法等。合謀。欲危

太祖。叛附哈達。

太祖謂公曰。貝渾巴顏。汝兄之人。汝往殺之。公遂往。盡殺其父子五人。無一脫者。以其家產。奴僕。勅書等物。盡賜之。界凡人有名科什者。恃其勇。盜去阿都叔之馬九匹。公單騎追至庫勒之野。斬科什。盡獲九馬。以與阿都叔。被劄一。癸巳秋。葉赫等九國。合兵三萬。分三路

來侵。

太祖與衆貝勒。率兵至古勒山以陳。

命公以百人誘敵。葉赫等兵見之。罷攻赫席黑城。來與公接戰。公整兵以待。射敗敵兵。斬九人。敵兵稍退。葉赫貝勒布賽。金台石。蒙古科爾沁部落。貝勒翁阿代。明安。莽古思。復併力合攻。布賽貝勒墜馬。公令麾下名吳談者。刺殺之。葉赫等兵見之。相與號泣而潰。於是衆貝勒皆膽落。咸各棄其士卒。奪路逃竄。明安貝勒墜馬。衣袴皆失。跨驕馬而逃。

太祖縱兵追殺。斬首四千餘。填溝壑者甚衆。所得馬匹甲冑等物無筭。是役也。殺葉赫貝勒布賽。生擒吳喇貝勒

布占泰。

太祖大喜。以己所乘名馬。併布賽貝勒所乘之馬。衣服橐鞬。明安貝勒之囊橐等物。盡以賜公。自此滿洲諸部落皆尊奉。

太祖不敢復萌乖張之念矣。是年冬。訥音部長搜穩塞克什。聚七寨人。欲叛往輝發。其明年春。公與噶蓋札爾固齊。順科落巴圖魯。率兵千人往討之。圍攻訥殷佛多和城。歷三月克之。斬搜穩塞克什以歸。以唐泰莫爾根。杜陵俄二族人丁。盡賜之。又取訥賽山寨。卓佳村時。我兵有名齊法漢者。歿於陣。衆皆不能出其屍。公回擊陷陣。疾戰敗敵。取其屍以歸。歲在丙午。蒙古五

部長共尊

太祖皇帝為聰睿罕。議功行賞。授公為一等大臣。以所獲俘

虜。編三佐領。賜為專屬佐領。丁未五月。公與卓立克

圖貝勒。率兵千人。往討赫席黑俄漢惠蘓魯佛納赫

村。取三部落。俘二千人以歸。庚戌冬十一月。公自督

兵千人。討東海兀集部之那木都魯。綏分。寧古塔。尼

馬察。四部落。降其大臣康果里等九人。九人者康果

昂五明噶圖烏路噶僧格尼喀里唐松阿葉克舒。令伊等家屬前行。公回取

雅攬部落。俘萬人以歸。癸亥冬十二月。公與達爾漢

下。何和里額駙。率兵二千。往討兀集部之虎爾喀路。

圍札庫塔城。三日未肯降。遂攻入其城。斬首千人。俘

虜二千人。招降其附近部落土勒申。額勒申。二大臣。

俘五百戶以歸。又同順科落巴圖魯。率兵攻取馬根

單。花豹衝。三岔里舖。取之。大獲以歸。癸丑春。

太祖躬領大兵。討吳喇國。陳兵俄漢城。不忍遽戰。欲待布占

泰來請罪。公同古英巴圖魯貝勒等。進諫曰。乘此不

戰。倘布占泰。竟娶葉赫女。辱何如之。後雖戰。何益。

太祖從之。遂督兵交戰。公首先率衆。棄馬步戰。吳喇兵大潰。

既克其城。及凡屬吳喇城邑。皆降下之。遂滅其國。

太祖之仁威。自此愈著。遐邇咸尊戴矣。是年六月。公率兵四

百。擊取葉赫遊牧之蒙古。獲馬百匹。羊五百隻以歸。

歲在丙辰。

太祖皇帝正大位。初定制。度建置官職。設五大臣。總理國政。進公爵爲左總兵官。列五大臣。

命公傳至其孫輩。皆得食百人錢糧。天命四年己未三月。明總兵官杜松。王宣。趙夢麟等六人。率兵六萬。出撫順口。軍界凡山。索戰。時大貝勒與達爾漢下先往。欲軍於僻地。以待

太祖駕至。

太祖繼至。乃與公議陳兵顯地。與敵相對。時我國築城界凡山。夫役等。見我兵顯然陳列。衆心乃定。

太祖至。即指揮諸將。及界凡山。夫役兵丁等。併力合擊。一鼓敗之。斬杜松。王宣。趙夢麟三人。士卒死者相枕藉。尸

骸。旗仗軍器。填塞渾河。河水爲之不流。自此明兵膽落。不復敢稱兵相向矣。公自年十九。首先從

太祖。効力戎行。凡攻城野戰。皆以身先士卒。奮勇圖功。身經百戰。創痕徧體。威名四布。所向無敵。公忠誠出自性生事。

太祖皇帝。始終如一。凡事有關於國家。雖己子亦不稍存私意。公次子名達啟。幼時。

太祖皇帝撫養於宮中。及長。英敏果敢。技藝絕人。

太祖甚寵愛。以女妻之。達啟遂恃

恩驕縱。漸至諸

皇子前。亦不少加遜讓。公察其情狀。恐爲後患。一日。率諸

子集於城外。令縊達啓殺之。

太祖聞之。追悼不已。甚怨公。後知公心。係為國遠慮。乃深與之。

太祖初以伯父禮敦巴圖魯之女妻公。命稱姑夫。繼以

太祖女和碩公主妻之。天命六年六月十四日。以疾卒於遼陽。享年六十。

太祖躬臨哭奠。盡哀乃還。十年。遷都瀋陽。移葬於城北鋪虎嶺之陽。山裏紅屯。崇德元年。

太宗皇帝。追封公為弘毅公。配享

太廟。

太祖皇帝時。公緣事削爵。未復而卒。平生勞蹟。有自述一篇。

天聰六年。議叙諸臣之功。公之諸子。錄公自述。繕摺具奏。

太宗皇帝憫其勞。以公第十六子遏必隆。為精奇尼哈番。後遏必隆以罪誤削爵。順治十一年。

世祖皇帝特命建碑墓前。以表揚之。康熙三十七年。

聖祖皇帝巡幸盛京。躬臨墓次致奠。

賜御書碑文。勒石墓前。以加褒崇。五十二年。

聖祖皇帝。因閱

太祖

太宗兩朝實錄。念公所建勲績。宣著史冊。現配享

太廟。不忍以其子孫罪誤。削去官爵。特頒

洪恩以原授一等精奇尼哈番著孫音德承襲。

公五配。一不知姓氏。一覺羅氏。即禮敦巴圖魯郡王之女。一通殷氏。一通殷氏之妹。一即

太祖皇帝之第四女和碩公主。子十六人。女十二人。一女適尼堪貝子。公主所出也。一女為

太宗皇帝妃。通殷氏所出也。其十女。皆不知其所歸姓氏。

行慶錄卷之十

曾孫愛必達敬纂

開國佐運功臣弘毅公家傳

公諱額宜都。所稱巴圖魯者。其

賜號也。姓鈕祜祿氏。先世長白山人。以資雄於鄉。至祖諱阿

陵阿拜顏者。移於英嶧峪家焉。父諱都陵阿巴圖魯。

公生於壬戌歲。明之嘉靖四十一年也。幼時。父母俱

為讐所害。公匿於鄰村家。獲免。稍長。志趣超邁。武勇

絕世。年十三。遂殺其讐。公幼孤。無伯叔兄弟。惟一姑。

適嘉木湖寨長穆通阿。至是往依焉。姑子哈思護。傑

士也。長於公。二人相得懽甚。居久之。適

太祖高皇帝龍潛有所往。過宿姑家。公與

帝語。意相合。且識為異人。欲從之。姑不可。公奮然曰。大丈夫

生世間。能碌碌終老乎。因請於姑曰。此行任所之。決

不貽姑憂。翌日。遂從。

太祖去。是時公年十九。少

太祖三歲也。

太祖器之。日見信用。未幾。圖倫城人尼堪外蘭者。構禍。

太祖罹家難。憤甚。思有以報。然時祇有十三人。力弱甚。公乃

請還嘉木湖寨。說姑子哈思護。哈思護並說薩察湖

城主諾敏那。齊戰河寨長楊書常書兄弟。各以眾來

附。遂共刑牲設誓。謀倡義復讐。

聖朝配天之業肇於此。而公實首勦其事焉。既而諾敏那

以間言背去。

太祖遂與公等。率眾伐圖倫城。公力戰先登克之。又攻色克

齊城。別督兵攻舒爾格布占城。皆下。先是

太祖德哈思護之歸附也。以同母妹妻之。乙酉春。哈思護為

忌

太祖者所害。

太祖暨公。哭之慟。厚葬之。四月。公從

太祖伐殺哈思護者於索爾和寨。公獨進殲其眾。按公此事

勅書及

國史本傳俱在取巴爾達城之後。今考

實錄在乙酉歲。而取巴爾達城在丁亥。故置此。丁亥八月。

城在丁亥。故置此。



太祖命公督兵取巴爾達城。至渾河水漲不可涉。公令士卒以繩相牽。魚貫而渡。率銳卒數人乘夜踰城。城中覺拒守甚力。公跨城上木堞以戰。飛矢貫體於堞。不得下。公揮刃斷矢。既下。戰益力。被五十餘創。不退。卒拔之。薩克查兵入寇。公率數人敗之。復乘夜取其城。攻尼麻喇城。先衆力戰破之。攻章甲城。獨前奪門克之。又界凡有科什者。恃其勇。盜九馬去。無敢追者。公單騎追斬之。嘉木湖有二巨族。謀叛附哈達國。公擒誅之。於是

太祖勢稍振。諸國咸懼。癸巳九月。葉赫國貝勒布賽糾哈達。吳喇輝發。蒙古科爾沁等國。并席北。句瓜爾察。及長白山所屬朱舍里。句訥殷等部。合八貝勒。四部長之衆。分三路入寇。攻黑濟格城。

太祖勒兵逆之。至古勒山。據險結陣。遣公以百騎挑敵。敵解圍來戰。斬其九人。葉赫貝勒布賽恃勇直進。馬觸木而踣。爲我軍吳談者所殺。葉赫兵皆哭。公乘之。諸國兵遂大潰。生擒吳喇貝勒布占泰。蒙古貝勒明安。棄鞍裸體。乘驛馬奔。僅以身免。

太祖縱兵掩擊。追至哈達國柴河寨南。是役也。斬級四千。獲馬三千。鎧冑千餘。軍聲大震。當是時。

國家兵力未強。敵合九國。兵連數萬。暮飯渾河北岸。爨火密如列星。望者股慄。將士聞報。皆震懼失色。事幾

不可知。

太祖以順禦逆。鎮之以靜。事詳

國史本紀。然能以少克衆。挫敵之銳。使我師得奮勢者。公之力也。

太祖因命公乘勝畧諾賽寨。及卓佳村地。我軍有歿於陣者。公奮擊破敵。取其屍歸。攻訥殷部於佛多和山。三月下之。斬其部長搜穩塞克什。蓋前合諸國入寇者也。攻東海兀集部。取赫席黑等三路。俘千餘人。別督兵招撫那木都魯。句綏分。句寧古塔。尼馬察四路。降康果里等九部長。旋師擊雅攬路。取之。俘萬餘人。復征兀集部。招札庫塔城。三日不降。攻破之。斬首千餘。俘二千人。因招撫其別路。獲民戶五百。又攻馬根單。句花豹衝。句三盆兒堡。皆克之。先是九國之役。吳喇貝勒布占泰被擒。

太祖釋之。妻以所生女。遣歸國。已而驕恣。屢蒙宥不悛。益無狀。癸丑正月。

太祖征之。布占泰勒兵三萬。越伏察哈城而軍。諸將憤怒思戰。

太祖慮有所傷。持之。公及諸將皆奮然曰。所患者。無計令敵出耳。今其軍在平塗。不戰何爲。

太祖許之。公身先士卒。下馬步進。大破吳喇兵。乘勝克其城。吳喇遂滅。吳喇於諸國最稱富強。既滅。於是諸國皆

以次收服。

太祖乃以丙辰年。建元天命。是時有理政大臣五人。即公。蜚

英二字切

東札爾固齊。句何和理額駙。句達爾漢侍

一音

衛虎爾罕。句嵩阿洛巴圖魯費揚。二字切古也。踰四

年。大破明兵於界凡山。亦賴公排衆議。耀兵列陣。力

戰而勝。其他征哈達輝發葉赫諸國。與明兵諸大戰。

皆力戰有功。天命六年。我師下遼陽。

太祖命於城東築第。賜公居焉。公性忠誠果敢。結髮從

太祖征討。身經百戰。金瘡遍體。其攻諸城寨時。率隻身夜往

佩火具。既登。燃之以爲軍號。或遂燔敵營柵。及爲將

尤善。以少擊衆。攻城掠地。所向皆捷。然尤明於大義。

雖與

太祖同闢草昧。而謹於事

上。孳孳不怠。

太祖之初起也。忌者恒在肘腋間。公出入帷幄。小心防侍。嘗

夜移

御寢他所。而寢其處。冀以身當之。公次子達啟。少英異。

太祖養於宮中。及長。材武過人。

太祖愛之。妻以己女。達啟怙寵。漸驕。遇

皇子皆無禮。公知之。一日假他事。集諸子僮僕。譙城外園

中。酒甫行。公忽起。命衆執達啟。衆愕然。莫知所措。公

大怒。露刃厲聲曰。天下有父殺子理乎。誠以此子志

大行慢不除。必爲他日國家害。不從者血此刃。衆乃懼。引達啓入室。以衣被覆殺之。公見

太祖陳之。且謝罪。

太祖驚惋累日。深以讓公。久之。知公之志。彌加嗟嘆。其爲國遠慮。忘已効忠。類若此。公旣爲

太祖股肱心膂。功冠當時。而

太祖之所以寵錫公者。亦極其優渥。其取巴爾達等城。及敗薩克查兵也。

太祖親迎郊勞。賜爲一等大臣。爵左總兵官。給以百人廩食。約身至孫三世食之。其敗九國兵也。以所得諸貝勒裘馬幄帳。并

御乘名馬。賜公。前後賞賚弓矢衣裘人戶牲畜無算。常分給將士。不以自私。初設佐領之制。

詔以公所俘獲者。益以賞給戶口。爲三佐領。隸公家。且詔無預上役。爲公私屬。供田虞。并採人參。備藥物。以奉公。下及諸子。各有分贍。蓋

異數也。然公性剛直。數以忤旨。罷歸第。每遇急警。

太祖輒召公。公至。衆心皆安。以故屢廢輒起。卒以功名終。公初娶

太祖從父郡王禮敦女。故時稱巴圖魯姑夫。及平吳喇。

太祖復以和碩公主妻焉。故又稱爲巴圖魯額駙云。公以天

命六年辛酉歲六月十四日甲申。終於遼陽。賜第。壽六十。當公之疾革也。

車駕臨視。垂泣與訣。及卒。

太祖震悼。墓祭時。

親臨慟哭者三。

太宗文皇帝崇德元年。贈開國佐運功臣。追封弘毅公。配饗高廟。復授公子遏必隆。為精奇尼哈番。世襲。公初塋遼陽。

盛京建。遷塋於城北十五里蒲湖山。

世祖章皇帝即位。復立碑以表之。康熙三十七年。

聖祖恭謁

陵寢。親奠墓次。越二年。復

御書碑文。勒諸石。公凡五娶。生十六子。名次官爵。具譜牒中。

而最著者。有忠義公忠直伯等四人。別為傳。公卒後

二十三年。當

世祖順治元年。天下混一焉。

贊曰。弘毅公之起也。偉矣哉。復家痛於髫齡。識

真人於旅夜。一朝萍水。氣兆風雲。卒之功勒旗常。盟深帶礪。

侑食於

在天。垂休於奕葉。膺

累朝之寵錫。動

聖主之興懷。倣之於古。庶幾十亂之宗。五臣之首也歟。若夫

豐沛諸賢。南陽群哲。有不可同日而語者矣。公舊無

傳。

聖祖御極。篤念勲庸。既以傳志。裨史官。又時

召公孫敏愨公。從容論說往事。且以

大內所藏。天命初舊籍

宣賜。并

召族人。咸得瞻

列祖實錄。於是公之本末。煥然簡冊。然當日畫鑪秘計。借箸英謀。尚有不可得而見者。嗚呼烈哉。

衍慶錄卷之十一

曾孫愛必達敬纂

弘毅公祠堂碑記

昔我

太祖高皇帝。誕膺

天命。肇造區宇。我

曾祖弘毅公。際風雲之會。首識

真主。早蒙

知遇。運籌帷幄。則決機制勝。允協

聖心。授鉞臨戎。則奮勇先登。屢摧勍敵。用此爵冠五等。姻連帝室。一心一德。為佐命宗臣。自

列聖相承。篤念舊勳。既已配享廟庭。世綿封爵。至於過墓致奠。

頒賜御書。勒石褒功。遣官薦告。隆禮異數。不可勝紀。初建家廟。在北城第宅之前。制庫狹弗稱。數世以來。子孫繁衍。至數百人。每當時享。室堂庭廡。幾不足以容。僉曰。宜更諸爽塏。以恢前度。乃卜兆於安定門外里八臺。與我

祖恪僖公。祠址相連。辨方定位。庀材鳩工。適會我

皇上叙錄總理事務。王大臣等。公之曾孫訥親。蒙

賜雲騎尉世職。上書陳奏。臣無涓埃之效。徒以先臣之故。

叨冒

聖恩。榮其後嗣。臣曷忍自私。願讓還雲騎尉世職。惟先臣

祠堂。乞

賜褒榮。列於典祀。有

旨。額宜都巴圖魯。乃開國名臣。勲績懋著。照訥親所請。於伊族祠堂。賜與祭典。永卹成勞。至賞給訥親雲騎尉世職。不必懇辭。恭承

寵命。子姓支屬。莫不感勵。協心僦功。廟貌有嚴。以乾隆三年二月十八日。遷主入祠。春秋吉日。太常致祭。有司薦徹。親賓觀禮。焜耀里閭。

公有子十六人。世嗣相承者。十有一支。十六公神位。並設兩廡。每官祭之次日。肅將牲醴。家薦歲事。享侑

獻酬。依古禮經。粵稽詩書。丕記宗功。從享大烝。已稱盛典。而家祠秩祀。比於前哲。令德之爲民質者。則惟我

皇上逾越之恩。前代所傳。未有倫比。凡

公之子孫。仰瞻棖栭。顧視几筵。必勤思前人奮跡。致忠之艱。

列聖崇德報功之厚。自少以長。或仕或處。各隨其分。而勉爲忠孝。以仰承祖德。則可以入茲祠而不忤矣。公之勲績。紀於旗常。載在冊府。無庸備述。故惟記更祠之始末。敬勒麗牲之碑。永久不忘。以交相砥礪焉。

衍慶錄卷之十二

曾孫愛必達敬纂

奏請家祠

賜祭疏

議政大臣兵部尚書領侍衛內大臣兼管鑲黃旗滿洲都統管理內務府戶部三庫事務

御前大臣果毅公訥親謹

奏。欽惟

皇上加恩戚誼。每推錫類之仁。篤念舊勲。恒著酬庸之典。臣以庸愚下質。荷蒙

聖主教誨生成義則



大君恩逾慈父。臣雖志切奮勉。情殷驅策。顧以職鉅任重。常慮識短才疎。未足仰副。

皇上優渥恩施。逾格期望之至意。故每夙夜抱愧。受寵若驚。前歲蒙

恩。將臣世襲二等果毅公。晉為一等。彼時伏念

皇上敦叙戚畹。推恩晉秩。未敢遽罄愚衷。冒昧辭請。茲因協辦總理事務。復叨

恩准部議。賞給臣雲騎尉之職。竊念臣備荷

高厚。黽勉趨承。自惟竭蹶不遑。寧有涓埃報効。豈可貪膺寵命。重滋惶悚。以速過愆。況以臣之謏劣。獲受

造就深恩。實因

皇上俯念臣曾祖先臣額宜都巴圖魯。宣力戎行。曾著勞

績。是以

推恩後裔。有加無已。而以臣捫心自揣。實覺輾轉難安。

追念先臣額宜都巴圖魯。遭逢

太祖高皇帝龍興。獲與佐

命。名在史冊。俯食

廟廷。仰荷

世祖章皇帝恩賜立碑於瀋陽瑩兆之前。

聖祖仁皇帝。復御書碑文勒石。

駕幸盛京。特

親致奠。邀

隆恩於曠典。實亘古所希逢。現今臣曾祖之孫支。不下數百人。咸感

主恩祖德之盛。共切水源木本之誠。而臣身受

殊恩。尤不敢忘世澤。返躬內省。知小臣

寵錫之難勝。推本興懷。念

國家報祀之有典。伏懇

皇上浩蕩鴻慈。免賜臣雲騎尉之職。於臣所設先臣額宜都巴圖魯祠堂。

恩賜祭典。永卹成勞。使世世子孫。共仰

君恩。益思祖德。而臣得藉以展報本之思。倍切啣環之戴。

合族人等。愈各景仰。遵守。以圖報答。

皇恩於無既矣。爲此瀝陳下情。仰祈

聖鑒。無任戰慄激切之至。謹

奏。乾隆二年十二月十八日。奉

旨。額宜都巴圖魯。乃開國名臣。勲績茂著。着照訥親所請。於伊族祠堂。賜與祭典。永卹成勞。至賞給雲騎尉世襲。不必懇辭。欽此。

奏請

恩停往奠疏

太子太保議政大臣領侍衛內大臣鑾儀衛掌衛事  
吏部尚書協辦戶部兼管戶部三庫事

御前大臣果毅公臣訥親等謹

奏為敬陳下悃仰祈

睿鑒事。本年五月二十七日。禮部奏請

皇上駕幸

盛京。應照康熙年間之例。遣官祭奠二王四功臣併大  
臣等。奉

旨。二王著遣官往奠。功臣揚武里。蜚英東。額宜都。朕親往

奠至盛京時奏聞餘依議欽此臣捧讀

溫綸彌深悚切伏念先臣額宜都巴圖魯幸逢

盛世得與佐

命荷蒙

列聖恩禮頻加既叨

廟食之榮光垂奕禩復邀

宸翰之錫寵溢泉壤又蒙

皇上隆恩特沛

命於先臣祠宇錫以春秋祭典永卹成勞

殊恩曠典屢被疊沾世世子孫實難報稱萬一今

皇上駕幸

盛京復

頒恩旨親行往奠聞

命之下感激涕零伏思

聖主篤念勲庸曲加異數誠臣子之極榮為依古所罕觀

惟是

聖恩愈重臣子之心愈以難安禮部遣官祭奠之請即人

臣難遇之

曠典伏懇

皇上恩停往奠仍准照例遣官則先臣額宜都巴圖魯泉

下臣子之忱庶得稍安臣合族人等益頂戴

洪慈於生生世世矣臣合族人等不勝懇切陳情之至謹

奏。乾隆八年六月十七日。奉

旨此

聖祖皇祖從前行過之事。此次朕躬往奠者。亦令伊等効力  
之意耳。這所奏知道了。欽此。

